

# *KWAKUBULA MALI NANGWA*

## *KWAKUBULA MUTENGO*

 Ke jishuko ja kubwela jibiji pa tabbanako, lukeelo luno. Amiwa mbena kukumyatu... Mulongo Neville waamba mba bavula kechi bakonsha kumvwa kunyuma ne. Mwakonsha nkung'umvwa bulongo, kunyuma koko nyi? Kijitu bulongo? Kijitu bulongo. Amiwa—Amiwa njiko pacheche, nanchi Nafwainwa kuuba kyongo kyabaya pakuuba mba bantu bayuke mba Amiwa mpoji.

<sup>2</sup> Nanchi, Navuluka kimye kimo kyo Naingilanga pa Kifulo kya Bantu bonse. Amiwa nakajijileng pa ntampulo... Kabiji Navwalanga masapato abaya, ajinga na byela mushi, nafumine na kwenda pa milaini ya peulu. Kabiji Nakajijilenga pa ntampulo. Kabiji ba Mrs. Ehalt, awo ke mulunda nami, wajinga pakwambwila malaiti. Ami naketekela mba ba Mr. Ginther kokwa bakonsha ku muyuka, bingi bulongo. Nanchi Edith waambile mba, “Billy, obewa ulenga kyongo kikatampe, bino kasa uji mulunda mucheche, ao ye Namonapo kala.” Kulekesha iye misumali ikatampe, kukajila pa ntampulo.

<sup>3</sup> Naambile mba, “Kyawama, Edith, Amiwa ne mucheche bingi, Nafwainwa kuleka muntu yense wayuka mba Amiwa njipoka, pakuuba mba kikale kyongo kikatampe.”

<sup>4</sup> Kyawama, Natwelele mukachi mambo a kwita. Mulongo Neville wajikumbula mba mulunda netu wawama, Mulongo Roy Roberson, ufwamo mu kupwila lukeelo luno, na mambo a kukolwa. Janji... Wajinga na jino ja kubikamo. Jaleta misongo, kabiji jamuletela mashika. Kabiji bafwainwa kwijitupulamo, Nalanguluka mba, ponkapotu. Kabiji Roy waikala nobe shentu muno, kabiji twamutemwa. Kabiji Naambile mba, “Mulongo Roy, Ami—Amiwa pano mbena kuya mu mamineti acheche, ku mpwijilo.” Naambile mba, “Amiwa nsakwipuzha kipwilo amba bonse tumulombelele, lukeelo luno,” kabiji ne keesha byo akayanga, pakuuba mba bakamukwashe. Jino jamena na kuzhobakana, nangwa musango umo, kechi jaikala bulongo ne, kabiji bafwainwa kwijichibamo, ne kwijifumyamo.

<sup>5</sup> Mulongo Roy wapitamo, nobe anweba bonse byo mwayuka, kufuma ku Nkondo Ya Bubiji ya Ntanda yonse, awo ye balozele. Kabiji inge kechi kyajinga buwame bwa Lessa ne, aye inge kechi waikele na bumi ne. Aye walajile mukachi ka bafu, pa kimye kyabaya; maboko achimukijile mumwe, ne mikupa yachibikile, kabiji mishipesipe yonse ibiji ikatampe ya onaikile. Kabiji dokotala waambile mba, “Inge waikala na bumi, aye kechi

ukendapo tampulo ne.” Kupichila mu lusa lwa Lesa, aye wingila pajuba pajuba, kukajila ne bintu byonse. Lesa waikala wawama kwi aye mambo ke muntu wawama, kabiji twamutemwa. Kabiji atweba, atweba—atweba kechi bonse . . .

<sup>6</sup> Inge twikala bwikaloko ololoka, akyo kechi kyalumbulula mba kuuba twakolwa ne. Kwambatu patoka, kyalumbulula mba makatazho onse atala kwi atweba. “Mambo byalumanamo byo byavula ku waoloka, pakuuba Lesa umupokolola mu byonse.” Alo lo lubaji lwawamisha.

<sup>7</sup> Nanchi tusa kwipuzha milombelo yapusanako lukeelo luno, yakwa Mulongo Roy. Nakumya kana mujipo umo muno, nangwa byonkabyo, ukeba kulombelelwa, ukeba kuvulukwa mu milombelo? Inge bakonsha kusutula maboko abo. Kijitu bulongo. Akyo kyawama. Twayai twimaneko pa kakimye kacheche, inge mwakonsha, kimye kyo tubena kulomba.

<sup>8</sup> Nkambo, twaiya leelo, pa ntendekelo ya sabando. Kabiji juba jibena kwenda, kukilang’anya ntanda yonse, pakuuba mba jilete kyeya ne bumi ku byobya byatongwelwa byobyo. Kabiji pa ntendekelo ya mpwijilo, byo tuji kibese kya Kipwilo Kyenu, akyo kyaitwa kukwachijila mingilo ya lubuko, lubuko lwa ku mubiji, mukufikizha nkebelo ne byakukabila bya Nkambo yetu Ao waashilwe na mambo amizhilulwila yetu, kabiji ku bipumo Byanji ko twabukijilwe, kabiji twaipuzha, ku ntendekelo ya mpwijilo, byo yatatulwa kwingijiwa, mu nyimbo, kabiji michima yetu yatatula kusutulwa, pakuuba mba tuvuluke, lukeelo luno, Nkambo, mutemwe wetu, mulongo wawama, Roy Roberson, kalume Wenu wikepesha. Kabiji twayuka mba Anweba mwapulwishe bumi bwanji ku nkondo, kabiji Anweba mwaikala wawama kwi aye. Kabiji leelo aye wakatazhiwa na kumanama, kya kuuba mba aye kechi wakonsha kutanwako ku kipwilo ne.

<sup>9</sup> Kabiji, Nkambo, kimye kyo balombelenga mu nzubo yakwa Yoano Mako, kwajinga Malaika waishile mu kaleya, amo Petelo mo abikilwe mu fungwa, amwa washikwile bizophilo, mu bukyafyamika, ne kumulupulamo.

<sup>10</sup> Anweba Nkambo, Anweba mukijitu Lesa. Aba Bamalaika bakijitu mu kukambizha Kwenu lukeelo luno. Twalomba, Nkambo, amba kimye kyo tubena kulomba muno mu nzubo yakwa Lesa, amba Bamalaika baye konka ku nzubo yakwa Mulongo Roberson. Nkebelo yanji ke yakwikala pa kifulo kyanji pano, bino misongo ya mukwachijila. Kabiji lekai ba Malaika bakwa Lesa bamupokolole, bamukoseshe bulongo, pakuuba mba a katole kifulo kyanji jibiji ku nzubo yakwa Lesa.

<sup>11</sup> Kuji bakwabo baiya na makatazho, abo—abo bakolwa. Kabiji twaji kumona mwanamukazhi mukote, byo akukebangwa mba ekale, wasutila maboko anji, byo aji kutalatanga ku mulu anji. Aye waiya ku nzubo yakwa Lesa, na kutambula lubuko.

Swishai, Nkambo, amba beye balupuke kasa babena kwenda, na bulume ne buyufu bwa mwanamukazhi mwanyike.

<sup>12</sup> Bonse bakwabo bajikusutula maboko abo, avula abo akusutulwa peulu, mambo kyanembwa mba, kabiji kyaambulwa mba, “Byalumanamo byo byavula ku waoloka, pakuuba Lesa umupokolola ku byonse.” Lekai tutumbuke leelo kuya mu lwitabilo, mikoko ya lwitabilo, yakonsha kwitupokolola atweba kufuma ku misongo yonse ne lumanamo. Kimye kya kupwisha kupwila, kechi mwikalepo wakokelela mukachi ketu ne.

<sup>13</sup> Kiswishai, Nkambo, amba yense wabula kwitabila usakwikala waitabila. Kabiji kimye kyo tubena kulanguluka langulukapo pa Kyambo Kyenu, lekai Mupashi Wazhila Ekitole ne Kwikibika mu michima yetu, kabiji momwa ne Kwikitekezha poso Kyaikala kipangwa kya Kyambo. Ubai kikye kwi atweba, Nkambo, byo twikepesha na kukunyika mitwe yetu ne kwikipuzha mu Jizhina ja Yesu. Amena.

Anweba ikalaiko.

<sup>14</sup> Kasa tukyangye kutwela mun mbila ya lukeelo luno ne, Nakonsha kutemwa mwaikala nakyo mu milanguluko yenu, pepi pepi. Inge kujipo bambo babena kukokoloka, kabiji bakeba kutanwako ku mpwijilo ikekela ku Middletown, Ohio, kutatula pa Kimo, mulungu umo, kukekela pa kibaza kya bisela.

<sup>15</sup> Bushe mwayuka jizhina ja kibaza kya bisela, Gene? [Mulongo Gene waamba mba, “Baamba mba paji ma mailoshi twelufu kuya ku Middletown.”—Waku.] Mulongo Sullivan. Middletown ke muzhi mucheche, Naketekela nobe Jeffersonville kuno. Ke kifulo kya mbola ya bbasiketi. Mulongo Sullivan ye kafunga ujiko kokwa. Uji yense wa bipwilo bya Mamboawama Onse, ako kuji pepi nobe sikisite-ne-bikwabapo babena kwingijila pamo muiyiye mpwijilo, bakakonsha kwimubuula kwepi kwaikela kikye kibaza kyabisela.

<sup>16</sup> Kabiji kukekala manzubo avula amanjila konka ku kibaza, nanchi Nabuulwa mba, mwakulamina bantu bakeyako. Kabiji mpwijilo ikatatala Pakimo kufikatu ne pa Kibelushi, moba sikisi. Kabiji kechi kukekala pa Mulungu ne, mambo a bipwilo bikwabo, pakuuba mba bakonsha kuya na kupwila kwabo kwa kimye kyonse. Kapepo, kukekala mpwijilo ya lubuko, nangwa milombelo ya bakolwa, kila bufuku. Kabiji muntu yense waitwa. Kabiji akya kikatatala pa Kasalakanduba wabu 10, kupita mu wabu 15, Pakimo kufika pa Kibelushi. Kabiji inge ubena kukokoloka, kabiji—kabiji uji na kukokoloka nkobe kubena kwiya, kabiji ukeba kwi kwingijisha mu yeo musango, kyawama, twakonsha kwikala bingi na lusekelo kwitala nenu.

<sup>17</sup> Natundaika bonse babula kubatizhiwa mu lubatizhilo lwa Bwinakilishitu, kushala panyuma lukeelo luno ne kwikilangulukapo. Kabiji ne kwinengezha ku mutanchi wa

lubatizhilo usa kulondela pepi nobe mamineti foote-faivi, Naketekela. Akyo kisakwikala ponkapano pa kipwilo.

<sup>18</sup> Tuji bingi na lutundaiko lwa bantu kubatizhiwa mu lubatizhilo lwa Bwinakilishitu, byo twayuka mba kyanema bingi na mambo alupulukilo. Mambo kyanembwa na Nkambo yetu, mwingle Wanji wapelako, mwingle Wanji wapeleleko ku Kipwilo. Nangwa, byonka byo Atumine Kipwilo, pakupelako, Aye waambile mba, “Yainga panopantanda ponse, na kusapwila Mamboawama ku kilengwa kyonse. Aye waitabila ne kubatizhiwa ukapuluka.” Nanchi twayuka mba kikebewa ku batizhiwa kwibizha mu meema.

<sup>19</sup> Kabiji tusakwikala balusekelo pa kwingila yuwe mwingle kwi anweba, ku uji yense awo wanshiniinwa mu muchima wanji amba Yesu Kilishitu ye Mwaana wakwa Lesa, kabiji amba Aye wafwijile mu kupulusha bandengamambo, kabiji obewa wajinga yewa umo Ye afwijile amba amupulushe; kabiji wafwainwa kutemwa kwiya na kubatizhiwa mu Jizhina ja Yesu Kilishitu mululekelo lwa mambo obe; kwaamba, ku ntanda, amba anweba mwaketekela mba bubi bwenu bwalekelwa, kabiji pano anweba musakwikala mwanawabwanga wa Nkambo Yesu, aye atole kifulo kyobe.

<sup>20</sup> Inge kechi muji na kipwilo kyakuyako ne, twakonsha kwikala balusekelo kwikala nenu mu lumvwang’ano lwa bupopweshi pamo ne atweba. Kechi tujipo na bamembala kuno ne. Ke tabbanako washikuka, wa Mubiji yense wa Kilishitu, wa dinominesheni uji yense. Twaimana nobe kyabula bundinominesheni. Kabiji twashikula kibelo ku bantu bonse, nangwa bekale bang’anyi, mushobo, mutundu, nangwa lufunjisho lwa kipwilo, yense watambulwilwa. “Yense wakonsha, kwiya.” Kabiji inge kechi muji na kipwilo kikwabo ne, twakonsha kwikala balusekelo mwaiya ne kwikala netu mulumvwang’ano lwa bupopweshi. Kechi kujipo kintu kya kwamba mba mwinungeko ne. Kwiyat mu kimye kyakushikula bizhilo, ne kwikala nalumvwang’ano lwa bupopweshi pamo ne atweba. Kyo kyonka kyo mukeba; iyaitu anweba byonkabyo. Iyai na muchima washikuka, ne kubika mapuzhi obe ku jiwilo, kabiji ne kwitukwasha byo tubena kuya kulutwe na mambotu a Bufumu-bwa-Lesa. Mambo, twaketekela mba kimye, kijitu pa bwipi, apo bintu byonse byaambiwe mu Baibolo bikafikizhiwa.

<sup>21</sup> Kechi pajipo luzhinauko ne anweba bavula mwatanga yakwa Khrushchev, ng’ambilo yanji ku U.N., juba jikwabo, nobe byonka byo bang’ambwijile kufuma ku pepala wa ku Canada, ku mulunda nami. Aye waambile mba, “Inge kuji Lesa, Aye winengezha kufumyapo ne kutokesha tempo ne jikwabo, na anweba makapitolisiti, nobe byonka byo Aubile ku ntendekelo.” Nanchi pano anweba mwakonsha kutanga mukachi ka mulaini, “Aye wanengezha kufumyapo tempo jibiji.” Kabiji kyatama, wa komyuminisiti wakonsha kwamba kintu kyamusangom yeo? Aye

wajinga na kintu kimo, nangwa byonkabyo. Abyo ibyo. Kyajinga ba kapitolisiti, ku ntendekelo, baletele lukatazho. Atweba twi makapitolisiti.

<sup>22</sup> Naumvwine mutemwe wetu, kafunga watemwikwa, Mulongo Neville, waambilepo ng'ambilo imo pa televizhonyi... nangwa byambo ku waileshi, lukeelo lukwabo, akya kyatwajijiletu nakuya, mu milanguluko yami. Amiwa kechi ne kilubako ne. Nekyambwile ku mulunda nami, bufuku bwapita. Kabiji akya kyajinga kikye, amba kukekala... Panyuma ya kufumyapo Mupashi Wazhila, kufuma pantanda, akya kipwilo kya kisho kikatwajijila nakuya kulutwe, kwakubula kuyuka ne lupsano ne. Bushe mwakyubapo kala, bushe... Baanga baumvwa kyokyo? Kechi kyajinga kya kukumya nenyi? Abo kechi bayuka Mupashi Wazhila ne, nanchi abo kechi bakayuka kimye kyo Akaya ne, kabiji abo bakatwajijilatu nakuya mumusango umo. Umo wapelako byo akabikwa kateteshi mu Mubiji wa Kilishitu, abo bakayangatu kulutwe, na kweseka kuleta baitabila kwi Aye, mambo kechi bayuka Byoaji ne. Kabiji bupopweshi bwabo bwakisho bukatwajijilatu byonka byo kyajinga. Bino, kechi kyakonsha kutwela mwi anweba nobe byonka byo kyatwelele mwi amiwa ne, bino aya yajinga ng'ambilo ya kukumisha bingi. Amba, bakekala kwalepa bingi, mu bupopweshi bwakisho, kya kuuba mba bakamutupila Mupashi Wazhila, mambo kechi bamuyuka Byoaji ne, kyakutatwilapotu.

<sup>23</sup> Lesa tubilai lusa. Mulongo, Nakonsha kutemwa kwikala mu buno bumi, kabiji kukabila kwami, kyakuuba mba nangwa kwaikala kumufichisha pa muchima Wanji pacheche, Amiwa ke kiyuka mu muchima wami. Amiwa inge nakonsha kubapo kintu kimo kya kumufichisha pa muchima Aye, Nakonsha kwikyuvwa mu kakimye kacheche.

<sup>24</sup> Nangwa kyaikala, kufumapo Kwanji; Amiwa kechi Nakonsha kutemwa kwikala pano Aye kasa abulapo ne. Kyawama kufumapo pakyokya kimye, ee, mwane, mambo kechi kukekalapo Mashi pa kipona kya lusa ne. Kikekala kyafituluka ne bwishi kabiji kifita. Amwa mwazhila kechi mukekalo Ng'ambi, wa kwitusashijilako mambo etu pa kyokya kimye ne. Mwayuka mba Kinembelo kyaamba byobyo? Mwazhila mwafutumukilenga bwishi. Kechi kwajingapo Mashi pa kipona kyalusa ne, nanchi ke buchibishi bwamambo.

<sup>25</sup> Inge Nkambo ukaswisha, kimye kimo kutatwilo ya kisalo, uketupa mafuku-acheche a kusangululwa, Amiwa ne kyubiletu mu milanguluko yami, Nakeba kutola yewa Buuku wa Lumwekesho, ne kufundapo pa kikye, kuya kupita mu Buuku wa Lumwekesho, kuyatu.

<sup>26</sup> Pano, leelo, Nayuka mba kuji bavula beya, na kulombelelwa. Kabiji ofweshi wami wajikushikwa leelo, nangwa uno mulungu.

Kabiji bantu bamo bajikwiya, kechi baginga na jishuko ja kwi balombelela ne, kokwa ne, mambo a kuuba mba bansongwalume baji kukomboka, juba jimo nangwa ne akwabo, na kukokoloka. Baji bingi na mwiningilo wakuuba; mwiningilo wabo bene, kubikapo ne mwiningilo wa ku tabbanako, kabiji ne lwito lwa mafoni ne bintutu biwabo. Kikukwata bukiji pa mishipeshe yobe. Kabiji nanchi ao o ene mambo. Nayuka mba Nafwainwa kuya kuntu kumo, mu kimye kimo, kabiji naubako kintu kimo kyapusanako, kabiji Nayuka mba booba, ne abo. Nanchi, ba bangichile. Naambile mba, “Naketekela mba kyakonsha kwikalatu bulongo.” Kabiji tusa kulombelela bakolwa, mu bimye bicheche.

<sup>27</sup> Kabiji Nalangulukile mba twakonsha kutanga bimo kufuma mu Kyambo kya Lesa. Inge muji na Baibolo wenu, twayai tuzhikule mu Buuku wa Isaya. Natemwa kwimumona anweba mwatola Buuku wenu ne Kumutanga. Ntanga... Inge kechi kukila pa kimo nangwa Byambo bibiji byo tutanga, nangwa byonkabyo, Ke Kyambo kya Lesa kya Peenape, Kyambo kibula kufwa. Kechi kya konsha kupita ne. Kyabu 55 kyapitala kya Isaya, mutwe wa byambo, “Lupulukilo lwa myaka ne myaka.”

*Umvwai, anweba bonse mumvwa kilaka, iyai kuno  
kuji meema, kabiji ne yewa wabula mali; naye eye,  
atambule kajo, aje; ee, iyai, na kupota binyu... mukaka  
kwakubula mali kabiji kwakubula mutengo.*

*Mambo ka o mutayila mali enu pa bintu byo mubula  
kukonsha kuja? ne fweto yenu pa bintu byo mubula  
kutondwa? telekai bulongo byo mbena kwamba, muje  
byawama, kabiji lekai mweo wenu asangalale pa kuja  
byanuna.*

*Kunyikai kutwi kwenu, mwiye ko nji: mumvwe, ne  
mweo wenu ukekala na bumi; kabiji Amiwa kalenga  
lulayang'ano lwa myaka ne anweba, nangwa lusa lwa  
kine lwa kwa Davida.*

<sup>28</sup> Nasaka kwamba kwi anweba, pa kimyetu kicheche, pa mutwe: *Kwakubula Mali Nangwa Kwakubula Mutengo.*

<sup>29</sup> Kuji bintu byavula bingi bipana kisangajimbwe mu moba etu. Kuji bintu byavula bingi bitundaika bantu ku kyo tutela mba “kisangajimbwe,” kabiji ke kya bantu bonse, ba myaka yonse.

<sup>30</sup> Kuji bya bongozhi bya banyike, mazha akatataka ne bijilo bya-mazha-akuzhokoloka, ne nyimbo yo bajinayo ilondela monka. Kabiji byonsetu ke byangozhi, bya kisangajimbwe.

<sup>31</sup> Amiwa kechi natako muchima nangwa mwaana akomene mu nzubo ya musango ka, kabiji ne byo afunjishiwa kuuba bintu byawama; inge awa mwaana kechi waswa kupita mu Kusemwa kupya ne, nyimbo ya-mazha-akuzhokoloka yo ikebula bukiji bukiji pa kwiyumvwa. Mambo, mwi aye, mwasemekwa mwi aye,

kupichila mu kisemwa, mupashi wa buntushi. Kabniji bulume bwakwa diabola bwabaya bingi, leelo, poso bwakwata mupashi wa yewa mucheche.

<sup>32</sup> Pano kyakonsha kwikala byepi ku mukulumpe, nanchi, ao wakana Kusemwa kupya! Mambo, kanatu bumi boobe bwapiipulwa, ne kwalululwa kabiji wasemwa kipyä, mu Bufumu bwa Lesa, kisemwa kyobe kikekala na bintu bya muntanda, nangwatu wikale wa bumpopweshi byepi, poso akya kyapipulwa mwi obewa. Wakonsha kupopwela ne kwikala wa bupopweshi, bino nangwa byonkabyo akya kikekala na bulume bwakunkoka mwi obewa, mambo awe muntu wakala wa bundengamambo ne kukabila kwanji kechi byakifwa mwi obewa ne.

<sup>33</sup> Pakuuba inge Kilishitu waikala pa kipona kya mu muchima obe, abyo bintu kechi bisakamika ne. Wikala wabaya bingi.

<sup>34</sup> Amiwa kechi nakonsha kutongola jizhina ja mwanamulume ne, mambo kechi Nakonsha kuvuluka jizhina janji ne, pakuuba anweba bavula mwakonsha ku muvuluka. Baamba mba kwajinga jikuji ako banabalume nkobayanga, na kufyama, kabiji banabakazhi balupuka, kasa bembä. Kabiji nyimbo yabo yajinga ya kukebula, kyakuuba mba bakyoba ba mato bapita, mu mato, bafwainwa kuitapo. Kabiji nanchi abo bashilikale bafyama bakonsha–bakonsha kwibakwata kya kubazhimukilatu, ne kwibepaya. Kabiji muntu umo kinemanga wakebelenga kuitapo. Kabiji wakambizhe bakyoba banji ku mukashila ku jishiki, ne—ne—ne kubikamo kintu kimo mukanwa kanji, pakuuba mba kechi wakonsha kubijika ne; kabiji—kabiji wabika bupula mu matwi aba kyoba banji, pakuuba mba babula kumvwa, pakupita kwipi, amba bekyumvwe. Kabiji ne banabakazhi balupukile, na kuzha ne—ne kubijika, ne kwimba, kabiji, oo, kyajinga kyawama bingi, poso waalwile kikoba kya nkuku yanji, na kubijika ku ba kyoba banji, “Konekelaipo! Konekelaipo!” Bino abo kechi bakonsheshe kumumvwa ne, bajinga na bupula mu matwi abo.

<sup>35</sup> Kabiji pano bafikile pantu pamo po bafwajilwe kukasululanji, nangwa, kukasulula maboko anji, kabiji ipo poafwajilwe kufumya bupula mu matwi abo. Akwa, byo aendelenga mu mukwakwa, waumvwine nyimbi wakijile kwimba bulongo kukila ne bajinga kokwa, kabiji byo bapichilepo ne jikwabo, baambile mba, “Oo, mbazhi mukatampe, twakonsha kukukashila ne jikwabo ku jishiki ne jikwabo?”

<sup>36</sup> Aye waambile mba, “Ine, kasululaitu. Amiwa naumvwapo kintu kimo kyabaisha, poso akya kechi kyakonsha kukatazhapo jibiji ne.”

<sup>37</sup> Abyo byobyo kiji ku Mwinakilishitu wasemwa-jibiji. Batana kintu kimo kyabaisha kukila kuzha-mazha-akuzhokoloka ne bya kisangajimbwe bya ino ntanda. Abo bapewa kisangajimbwe

ku Mupashi Wazhila. Kyakila kubaisha, kyakuuba mba ntanda yonse ifwa kwi abo.

<sup>38</sup> Bino inge mwaya ku kikye kisangajimbwe kyabula mutengo, wafwainwa kuvuluka mba wakonsha kusenda mali avula bingi. Mulongo mwanyike utwala mulunda nsongwakazhi ku bibyebijilo ne ao mazha, kabiji ne bintutu bikwabo, aye ukalipila abaya malipilo anji a mu mulungu. Kabiji bantu bukulumpe beseka kuya na kutana kisangajimbwe pakuya ku bishimikwa bya malwa, na kutoma bulanda bwabo bwa mu mulungu, bakalipila mali abaya. Pano ng'anyi bintu byo bamwenamo? Kafwako kyo bafumyamo ne kanatu kukozha mutwe.

<sup>39</sup> Kabiji vulukai, wafwainwa kupwisha ne Lesa juba jimo pa kikye. "Kabiji fweto ya bundengamambo lo lufu." Kafwako kyo mubapo pano pantanda, na bibye ne. Ke kilola kyabubela. Kutoma kubaishatu bulanda. Bubi bukanungatu lufu pa lufu. Kyobe kyapelako kikekala kwabana na Lesa, Peenape; kuya mu Kizhiba kya Mujilo. Kabiji kafwako nangwa kimo kyakumwenamo ne, kana bono.

<sup>40</sup> Nanchi Lesa waiya ne kwipuzha jipuzho, "Kika kyakutaya mali obe pa bibye bintu bya kubulwa kutondwa? Kika kyo mwikyubila?"

<sup>41</sup> Kika kilengela muntu kukeba kwikyuba? Bataya onse obajinao, onse o bamwenamo, na kupota kutoma, na kumvwika mwanamukazhi umo ye benda naji, nangwa musango umo wa bya muntanda, kisangajimbwe kya byalwiso.

<sup>42</sup> Pakuuba twabuulwa mu Baibolo, ne kukambizhiwa kwi Lesa mba twiye, "Kabiji ne kupota lusekelo lwa Peenape ne Bumi Bwapeenape, kwakubula mali nangwa kwakubula mutengo ne."

<sup>43</sup> Abya bintu kechi byakonsha kulengela kutondwa ne, kabiji ne mpelo ya byobyo ke lufu lwa Peenape. Kabiji kyakonsha kukupwishesha mali onse o muji nao, pa kwikala—mukulumpe nangwa upana kisangajimbwe, nangwa nsongwalume uleta bisela, nangwa wikale ng'anyi, nangwa nsongwakazhi wayukanyikwa, nangwa musango yense ye ujimo. Kyakonsha kupwisha byonse byo uji nabyo, pakuuba mba ube kyokyo. Wavwala mu vwjilo yapeulu, kabiji—kabiji ne kuuba bintu byubapo ntanda, pakuuba mba bamwenemo cheki wa kuzhatwa kwa Peenape.

<sup>44</sup> Lesa waambile mba, nanchi, "Kika?" Kika kyo tukooba pa Juba ja Buchibishi bwamambo, umvwe twaipuzhiwa, kika kyo twaubijile kyokyo? Mukumbu wetu ukekala wa byepi? Ukekala byepi mukumbu ku America wakatataka, baamba mba kyaalo kya Bwinakilishitu? Kabiji kuji mali avula ataiwa ku wisiki, mu mwaka umo, kukila aya ku kajo. "Kika kya kutaila mali obe ku byobyo bintu?" Nangwa byonkabyo, kafulumende wafwainwa kukutuma kobalamina bantu bavulang'ana, pa musoko wa faividola ye mwatumine ku kipamo kimo akyo kyabula kufwainwa

kwikalala mundonda ya musoko, wakutumina bamishonale mu bushiya bwa tulunga. Tukepuhiwa juba jimo, “Kika kyo waubijile byobyo?”

<sup>45</sup> Atweba twi kyaalo kya Bwinakilishitu, kabiji mabbilyoni atumwa ku booba bantu baji kokwa, bo tubena kukeba kwikalala nabo bulunda. Bino babena kwibikana. Kechi kyakukumya ne kyaambijile Khrushchev mba, “Inge kuji Lesa, Aye ukatokesha ku kipango Kyanji jibiji.” Batunshi bakonsha kwamba yoyo ng’ambilo, mu kuleta buvu kwi atweba. Ke kintu kyatama bingi! Kabiji twitela atweba bene mba Benakilishitu.

<sup>46</sup> Lesa waambile mba, “Iya, mupote Bumi Bwapeenape, kwakubula mali, kwakubula mutengo ne.” Bumi, kwikalala na bumi myaka ne myaka, kabiji atweba twavundaminako ku Kikye ne kwikiseka mu kilungi Kyanji. Kika kyo tukooba pa joja Juba? Kika kikekala . . . ?

<sup>47</sup> Inge Lesa witupa bintu byakuba, kabiji witupa mali, kabiji witulenga kwikalala kyaalo kyanonkesha mushi ya mwiulu, nanchi Lesa uketwipuzha, kika kyo twaabile nao. Kika kyotutaila mali etu ku bintu bibula kuleta kutondwa? Kechi ku kyaalo kyonka ne, bino akyo kikekala pa umo umo; kufuma ku bangwe, kuya ku mamilyoni amadola, umo umo bakamupa.

<sup>48</sup> Inge bantu beipaya abo bene: Natangilenga sawakya katatakaru, ako bansongwalume babiji baingjilenga pa nkambi pa kwipaila nyama. Umo wajinga na baana faivi, mukwabwo wajinga na babiji. Kabiji umo wa mwiabwo bafwaijilwe ku mulekesha kinto. Kabiji umo wa bansongwalume wajinga na baana babiji, nangwa wajinga na baana faivi, watundaikilwe mba wakebelenga mingilo kukila yewa uji na baana babiji; kabiji waile nanji na kwipaya nyama, kabiji wamulozele mu nyuma.

<sup>49</sup> Mali, ao ye musango wa kyaalo, ao ye musango wa ng’umvwino, ao ye musango wa mupashi uji mu bantu bavula.

<sup>50</sup> Nanchi mwakonsha kumona Kusemwa kupya byo kyafwainwa kwikalala. “Wafwainwa kusemwa jibiji.” Byo kyafwainwa kwikalala. “Iya kwi Amiwa, ne kupota kwakubula mali.”

<sup>51</sup> Obewa kechi wakonsha kwamba mba, “Amiwa kechi najinga na mali ne.” Obewa kechi ukebewa mali ne. Kyapanwa kyatuntu.

<sup>52</sup> Atweba bena America twatema kulipila ku bintu byonse. Ao yo ng’ambilo yetu ya busulu. “Twalipila mambo a bintu. Tuji na mali.” Kupana mali etu a madola ku byaalo bikwabwo, kabiji ne bikwabotu, abo bukamulanda. Mwatwelamo, mukamona bakang’enda beeya, bonse bamvwala mayona ne byawama. Benamerica bebapa bintu. Abya ke bintu byandochi ku meso akwa Lesa. Akyo kechi kikalenga jishinda jetu ja kuya Mwiulu ne. Bino bintu byonse mu America, twafwainwa kulipila pakuuba mba tube byonse.

<sup>53</sup> Obewa waya mwakujila, kabiji waja kajo kobe ka mulajilo. Kabiji inge kechi wabika mali pa tebulu ne, kupana byabupe kwikaseya, mikanyi iya pa kilungi kyanji, panyuma ya kulipilwa ku kapanyi ko engila mingilo. Kabiji akyo kyafwainwa kwikala pa kipimo kya teni paseti, nangwa kukilapo, pa malipilo enu. Inge kechi wauba kyokyo ne, awa kaseya ukumona nobe muntu ntanyi bingi nangwa wanobe—nobe wakaso. Kimye, aye kyo abena kutambula mali anji. Nalanguluka mba ke kyamusebanya ne buvu, pa kwikyuba. Nalanguluka mba ke milanguluko yatama mukyokyo kyaalo. Baikalanga, bantu bawama, bifulo byawama, kechi bakonsha kuswisha kyokyo ne. Bino byonse bibena kuya mu mupashi umo mukatampe.

<sup>54</sup> Nailenga pa lwendo, mu sitima. Kabiji wa mingilo... Najinga na ka kyola kakacheche mu kuboko kumo, ne sutukesi kukwabo, kabiji ne ka kyola muji byakutendelako myevu mu maboko ami, kabiji naendelenga. Awa wamwingilo wayishile, kwamba mba, “Bushe Nakonsha kwimusendelako?”

<sup>55</sup> Naambile mba, “Oo, Amiwa mbena kuyatu kokwa ku sitima, mwane. Ne musachila, bingi mwane.” Pepitu nobe, oo, musiso wa mayadi sate.

<sup>56</sup> Aye waambile mba, “Amiwa nsakwikisenda,” kabiji watolele aka ka kintu kakacheche ne kwikasenda, ke aaye ne kuya.

<sup>57</sup> Kyawama, byo aishile, Nalangulukile mba kape Na... Nayukile mba ulipilwa, bino Namupeletu ka—ka afu ka dola. Aye kape walamine, bipe byami, pepi nobe, kwamba mba, mineti umo; pelepa nobe kwapelela ino tabbanako, po akajijiile mu sitima. Nakajijile mu sitima, patanshitu, nafikiletu ne kitambula. Namupeletu dola wa afu.

Aye waambile mba, “Mineti umotu!”

Naambile mba, “Kyo kika, mwane?”

Aye waambile mba, “Najikwimusendela byola bisatu!”

Naambile mba, “Ee, mwane, abyo ibyo. Kika, kika kyatama?”

<sup>58</sup> Aye waambile mba, “Kupingula kwami kwakepa ke tweti-faivi maseti pa kyola kimo. Anweba mujin na kongole yami maseti tweti-faivi.”

Monai, abwa ke Bwinamerica, bintu byonse byafwainwa kulipilwa.

<sup>59</sup> Umvwe mubena kuya na motoka wenu waponena mun kimbo, kabiji muntu umo wamufumyamo mu kimbo. Wafwainwa kwinengezha kulipila, mambo basakukulipilisha pa kyokyo. Inge yewa undosang’ana wakusenda, usa kukulipilisha *mukananga* pa mailoshi umo. Kabiji inge wi jimi, ke bipimo naini pa teni, wasenda talakita wanji, kyakonsha kukila pa kyokyo.

<sup>60</sup> Obewa wafwainwa kulipila pa byonse byo bakubila. Bintu byonse ke “Kulipila! Mali! Kulipila! Mali!”

<sup>61</sup> Kabiji nangwa byonkabyo kyabaya byepi kimbo kya bubi kyo bemuponeshamo! Ng’anyi wakonsha kukufumya mu kimbo kya bubi? Bino Lesa ukufumyamo mu kimbo kya bubi, kwakubula mali, kwakubula mutengo, bino kasa kwabula nangwa umo wakukufumyamo ne.

<sup>62</sup> Inge kechi wakonsha kulipila mali aukoka ne, obewa ukekatalu mu kimbo. Obewa wafwainwa kwikala na mali nangwa ne obewa wikalatu mu kimbo.

<sup>63</sup> Pakuuba kimbo kyakila mukutama kyo waponejilemo, ke kyokya diabola kyo akutalemo, ke kimbo kya bubi ne kubula luketekelo. Lesa mukyaswa muchima wanji ukakukokamo, kwakubula ne mali, kwakubula ne lupoto. Nangwa byonkabyo obewa wikalatu mukimbo, na kwisansa bubi, kabiji kechi beta ne pa jizhina Janji ne.

<sup>64</sup> Inge wamona wa kukundosa, javula babikamo cheni mukatampe monka mu kimbo, bekikashila ku kyela nangwa ku kintutu kikwabo, kabiji watatula ne kujizha. Kabiji bulume bwa motoka butatula kukoka, ne mashinyi atatula kwingila, kabiji wakundosamo.

<sup>65</sup> Kimye Lesa kyo akutana mu kimbo kya bubi, kabiji wa kumvwa kasa ubena kwita pe Aye, Aye utuma cheni wafwaijilwe kupombwa kuzhokoloka ku Kalvali, butemwe bwa Lesa, kabiji wikitashila ne pa muchima obe, kabiji wabikamo ne Bulume bwa Mupashi Wazhila momwa, bwakutatula kundosa. Kabiji kechi utayapo mali ne. Kabiji nangwa byonkabyo twikala mu kimbo mambo kuuba twalipila kufuma mu mapokochi etu ne. Atweba bena America tulanguluka mba twakonsha kulipila kufuma mu mapokochi etu, bino kuuba mwikyuba ne. Ke kyabula mali nangwa kyabula mutengo ne. Anweba kechi mwi kilipila ku kipwilo ne. Yesu walipijile pa Kalvali. Pakuuba bantu bekyumvwina buvu Kikye. Abo Bekikeba mu jishinda jabo bene. Lesa uji najishinda ja kwi Kitambwilamo, kabiji Ke kintu kyatutu inge wakonsha Kwikitambula.

<sup>66</sup> Javula, inge bakufumya mu kimbo, obewa wikalatu yense wakwanyinye, obewa wafwainwa kuya, ku kipatela. Kabiji kasa bakyangye kutatula kwingijila pe obewa ne, kintu kimo kasa kikyangye kubiwa ne, bepuzha, “Ing’anyi ukalipila mutengo? Inge twakonsha kusona bilonda, inge twakonsha kwichilamo mafuta, kabiji umvwe twakwasa manguya a—a kupana bukikizhi ku bulembe bwa mashi, uji nang’anyi ishuwalasi?” Kasa bakyangye kubapo kintu kimo ne, kwafwainwa kwikala mali mu mulaini.

<sup>67</sup> Pakuuba inge Nkambo wabika cheni Wanji wa butemwe mu muchima obe, kabiji wakundosa kufuma mu kimbo kya bubi, Aye ubuka muchima yense walajika, ufumyamo bubi bonse.

Kabiji mutengo ubikwa mu kalunga kakulubako, pakuuba mba kechi kyakuvulukilwa ne jikwabo. "Iyai, kwakubula mali nangwa kwakubula mutengo ne." Nangwa bakuchiba kyatama byepi, nangwa wakozhiwa kyatama byepi, nangwa kisemi kyobe kyube byepi, nangwa wauba kya byepi, kechi kujipo malipilo ku kikye ne. Aye ubuka mitwe, ufumyapo byonse bya bulanda. "Aye waashilwe na mambo amizhilulwila yetu, wafumpilwe na mambo abubi bwetu; lukabisho lwa mutende wetu lwajinga pe Aye; kabiji ku bipumo Byanji ko twabukijilwe." Byonse ke byatutu.

<sup>68</sup> Kabiji kechi twakonsha kwi Kitambula ne, ke mambo akuuba mba mupashi watama uji na luusa. Twanyachijilwa na mupashi wa kyaalo, mupashi wantanda, mukifulo kya kunyachijilwa naluusa lwa Mupashi wakwa Lesa, Mupashi Wazhila, ao witutangijila ne kwitubuula bonse Bukine, kabiji ulengela Baibilo kwikala byonkabyo.

<sup>69</sup> Kimye kimo kunyuma, Naambilenga ku muntu wabula kuyuka bupopweshi. Aye waambile mba, "Kilangulukaitu, Mr. Branham. Bonse bwe buyaji bwa bumi, kabiji kintutu kimo kyo tuji nakyo, amba atweba twapuluka, ke byanembwa byakala bya ki Yudeya."

<sup>70</sup> "Oo," Naambile mba, "mwane, akyo kyakonsha kwikala anweba kyo muji nakyo, bino Njina kintu kikwabo kyakila pa kyokyo. Amiwa njina Mupashi wa Yenka Wamunembele, ao Wikishiniikisha ne Kumulenga kwikala Byokabyo, mulaye yense." Aye kechi wayukile mwakubila na kyokyo ne.

<sup>71</sup> Monai, wafwainwa kwiya na kupota kwakubula mali, kupota kwakubula mutengo ne. Kechi kipotwapo kintu nangwa kimo ne. Ke kyatutu ku "yense wakonsha, mulekai eye." Lesa wakundosa kufuma mu kimbo.

<sup>72</sup> Kijitu pamo nobe mwanamulume wa pakibelo kya Buuya. Aye watailwe mu kimbo, kufumatu munda ya bainanji, kwi diabola wamupele bulema bwa kumaulu anji. Jishinda janji jakumwenamo bwikalo jajinga ja kulomba bukwasho ku bantu bipitanga nkaojinga. Kabiji byo aikele pa kibelo alwa lukeelo, wamwene basapwishi babiji bakipentekosito baishilenga. Kafwako nangwa koini umo ye bajinga nanji ne, mambo aye waambile mba, "Siliva Amiwa kechi njinayo ne." Kabiji ka koini ko kajali kakepesha ka ma silivwa. "Siliva ne golonde Amiwa kechi Njinabyo ne."

<sup>73</sup> Nafwanyikizha awa muntu walangulukile bibye. "Kechi kyafwainwa kutola kapu wami ne." Kapepo aye waesekelenga kusunga mali avula. Aye wajinga na myaka foote, kabiji kape wakebelenga kusunga mali avula, badokotala bakonsha kumulengela mikombo, ya kwendelako, mambo, aye, mutupokoso twanji mo mwajinga mwanekena. Kabiji kape wafwajilwe kwikala na mali, a kupanako, bamadokotala kasa

bakyangye kumupa bukwasho ne. Kabiji kyakine wafwainwa kukwachijila yuwe kapu ku baabo basapwishi ba kipentekosito babujile nangwa kimo ne. Jishuko jajinga mba, abo . . . baginga bingi bayaji, kyakuuba mba kechi bakonsha kutanapo kangwee kubaabo balongo ne.

<sup>74</sup> Pakuuba byo atajile mu kilungi kyabo! Umo, mwanyike wajingatu yufi; ne mukwabo, wajinga mukote kabiji uji na mikonya; nobe Yoano . . . nobe Petelo ne Yoano byo baile ku kibelo kyasakwa. Aye wamwenepo kintu kimo mu yewa mwanamulume yufi. Ko kuuba mba, buvu bwakijile kukila bwa muntutu. Aye wamwene pansi ya mikafi ne byakusakamana, bya juba jabena Galileya jasamijile mu kilungi kya funji wamasabi, pajinga “lusekelo lwakubula kulondolola, kabiji lwayulamo lukumo.” Aye wamweneko kintu kimo kyamwekele nobe kyapusanako pacheche.

<sup>75</sup> Mwayukatu, pajipo kintu kimo pa bya Bwinakilishitu, akyo kilengela bantu kumweka bapusanako. Bo bantu bakila bingi kulamba pano pantanda.

Kabiji watolele kapu wanji ne kumufumyako.

<sup>76</sup> Kabiji Petelo mutumwa, byo ajinga mukulumpe, waambile mba, “Siliva ne golonde Amiwa kechi Njinabyo ne.” Mung’ambilo ikwabo, “Amiwa kechi nakonsha ku kukwasha, kupota iye mikombo yakwendelako ne. Siliva ne golonde Amiwa kechi Njinabyo ne, bino Kyonji nakyo!” Aye wafumine na kupota kwi Aye wajinga na buki ne lusekelo lwa waini wa lupulukilo. Aye wafuminetu, moba abiji nangwa asatu kufuma popa, kufuma ku Pentekositi, ako kwamwekele kintu kimo.

<sup>77</sup> Kabiji awa mwanamulume mwanyike waambile mukatampe wabaya “amena” ku akyo, kabiji watajile mu kilungi kyanji.

<sup>78</sup> Kika kyamwekele? Awa cheni wa lusa, lusa Lwayewa waambile mba, “Amiwa najinga na lusa pa bakolwa,” yenka Mupashi umo wamwekele mu muchima wa yewa funji wa masabi. Aye waambile mba, “Mwaila mali, Amiwa kechi njinao ne, bino Njina kintu kimo kyakubiwa kyakonsha kusenda bimye ma milyoni. Nobe kyonka kyo Njinakyo!”

<sup>79</sup> Pano vulukai, Petelo wajinga Muyudeya, bamutemwa bingi mali, mwaila kisemwa, bino awe Muyudeya wajinga wa aluluka. Kechi, “Nobe Byonji nabyo, Amiwa Nsakukupotesha ne.”

<sup>80</sup> Bino, “Kyonji nakyo Amiwa, nakupa Amiwa! Kyonji nakyo Amiwa! Amiwa kechi njipo na peni mu pokochi wami ne. Amiwa kechi nakonsha kupota shinkwa ne. Amiwa kechi nakonsha kupota nangwa kintu kimo ne. Amiwa kechi njipo na kaseti ne. Pakuuba inge wakonsha kwikitambula, nobe kyonka kyo Njinakyo, Amiwa nsakwikipana kwi obewa mambo kyapainwe kwi amiwa.” Akyo kyokyo tukeba. “Nobe kyonka kyo Njinakyo, Nekipana kwi anweba.”

“Kika kyo uji nakyo, mwane?”

<sup>81</sup> “Amiwa najinga kwi Aye upotesha mukaka ne buki, kwakubula mutengo ne. Amiwa nakonsha kwi Bipana kwi obewa. Obewa kechi ujipo nakongole ku Kikye. Inge wakonsha Kwikitambula, Amiwa Nsakwikipedia kwi obewa. Kechi nobe wafwainwa kulipilisha ne, kana poso nobe booba bakonsha kupanatu.”

<sup>82</sup> Mambo, “Obewa watambula kyatutu, kabiji kyatutu panatu.” Kyajinga mwingilo wa Nkambo yanji, mobatu asatu apichileko panyuma. “Yainga panopantanda ponse, na kusapwila Mamboawama. Aye waitabila kabiji ne kubatizhiwa ukapuluka; kabiji aye wabula kwitabila ukazhatwa. Abye biyukilo bikebalondelanga baitabila: Mu Jizhina Jami bakapangilamo bademonia; bakamba na jimi ipya; inge batoma bintu bifwana, kechi bikebabeleka ne; inge batoola miloolo, kechi bikebabeleka ne. Monka mo batambwila kyatutu, kabiji ne kupana kyatutu.” Awa Muyudeya wapipwilwe.

<sup>83</sup> Kyo tubena kukeba mu America ke lupipu, lwa Mupashi Wazhila kutola kifulo kya bisho bya bupopweshi. “Monka mo mwatambwila kyatutu, panaitu kyatutu.”

<sup>84</sup> “Kyonka kyo Njinakyo, Napana kwi obewa: Mu Jizhina ja Yesu Kilishitu waku Nazala, imana wende”; Iwitabilo mu joja Jizhina jabula kuzhilululwa ja Mulenga! Kechi kyakukumya ne aye waile na kusukuta ne kukilauka, kabiji ne kutota Lesa!

<sup>85</sup> Oo, mwayukatu bintu bikatampe, aye kape waikalanga popa pa myaka foote, na kweseka kukeba mali avula a kumupotela mikombo yakwendelako, bino aye kechi wikyubile ne. Bino ponka pa kifulo kyabulwa kuketekelwa, kabiji pa kimye kyabulwa kuketekelwa, kabiji kintu kyabulwa kuketekelwa, bantu babula kufikilamo, aye watambwile kyo akebelenga. Amiwa njibingi na lusekelo mambo Lesa wikyuba tuyewa musango.

<sup>86</sup> Mu jibumba ja jicheche, jatelwa-mba booba kyongo kyazhila bufuku bumo, Nataine kyo Nakebelenga, akyo mali kyo akonsha kubula kupota ne. Mujibumba ja baluba kuyuka kutanga, babula kufunda, bantu bamvwajilo ya bukamulanda, Manegroes, kyakutatwilapotu, amwa mu saluni yakala yaaluluka, apa pansi, Nataine mutengo, mabwe abuneme; kimye awa wafituluka wakala byo antajile mu kilungi kyami, ne kwaamba mba, “Mwatambwile Mupashi Wazhila kufuma kimye kyo mwabitabijile nyi?” Oo, Kyajinga kintu kimo kyo Nakebelenga. Amiwa kechi naketekejilenga Kwikitana mukachi ka booba bantu ne, bino bajinga na kyo Nakebelenga.

<sup>87</sup> Ba U.N. leelo, kechi bakonsha kuswa kyo tuji nakyo ne, bino akyo kyokyo bakeba. Khrushchev, ne bonse bashala, babena kukeba Kilishitu, mu lubatizhilo lwa Mupashi Wazhila. Kikapipula byubilo bya kisemwa kyabo. Kikalengela bantu, bo

bapata, kwikala balongo na balongo. Kikafumyapo butanyi, ne kichima ne mankondo; ne kubikamo butemwe ne lusekelo, kabiji ne mutende, buwame ne lusa.

<sup>88</sup> Ee, mu bifulo byabulwa kuketekelwa, kimye kimo mo mutanwa kyo mubena kukeba.

<sup>89</sup> Ng'anyi kintu baana ba Isalela kyo bapaine (byonse bipukulwa bya mu Ijipita) kimye mivumbo yabo po yasuminenga mashi, kimye lujimi wabo po akobamine mukanwa nkabo? Bafwaijilwe kupana yense golode ye baonawijilengapo bena Ijipita, pa kaputu umo wa meema atalala awama. Batangi baabo ba mukiselebwa bebatangijilenga kufuma pa kizhiba kimo kuya pa kizhiba kikwabo, kufuma mu bimbo ne kuya ku mansulo, bino byonse byajingatu byauminwa.

<sup>90</sup> Nanchi kwaishile, kwakubula mali nangwa kwakubula mutengo ne! Aja Jiwi jaambile kwi ngauzhi ne kwaamba mba, "Ambe ku jibwe," kintu kyaumisha mu kiselebwa, kintu kiji kwalepesha kufuma ku meema. Akwa koka kilaka kyabo kyapwile, kwakubula mali nangwa kwakubula mutengo ne. "Ambai ku jibwe." Kechi kulipila jibwe ne, pakuuba "ambai ku jibwe."

<sup>91</sup> Aye ukijitu Jibwe bufuku buno. Aye ye Jibwe mu ntanda ya kukooka. Inge ubena kwenda mu yoya ntanda yakukooka, ambai ku Jibwe. Kechi mwafwainwa ku mulipila Aye ne; ambai kwi Aye. Kabiji Aye ye bukwasho bujipo mu kimye kya makatazho. Inge wakolwa, ambai ku Jibwe. Inge wakolwa-bubi, ambai ku Jibwe. Inge mwakookelela, ambai ku Jibwe.

<sup>92</sup> Monai, kyamwekele nobe kyakonsha kwikala kuji konse... Kyamwekele nobe, inge kechi kujipo meema ne amwa mu mampuzha mucheche amwa mwajinga mansulo, kechi kwakonsha kwikal meema payewa mutumba ku jibwe ne. Lesa uba binto na kubwela lunyuma kufuma ku byooby a bantu byo balanguluka. Aja jibwe, ke kifulo kyaumisha bingi mukiselebwa, bino Aye waambile mba, "Ambai ku Jibwe."

<sup>93</sup> Leelo, bantu bajimbaikwa bingi. Abo balanguluka mba inge baya na kwamba milombelo yabo, balipila pulisiti pa kwibambilako milombelo yabo icheche, be lipilila monse monse. Inge bakanshimika kipwilo kimo kyabaya kuntu kumo, kabiji ne muntu umo munoshi wakonsha kwikilipilila, batwajijila kwikala mu lukumbwa, baikala na muntu umo wakwibalombelela, aye ulanguluka mba ikyo. Lesa kechi ukeba mali obe andochi ne. Kintu kimo Aye kyo akeba kwi obewa ke kwipana kabiji ne bumi bobo bwaamba kwi Aye ne. Lesa wakupa obewa mali, kechi wiataaye kubitu bibula kuleta kutondwa ne. Ataaye ku binto biletu kutondwa. Bino pakuuba mba kilete kutondwa, kechi mwakonsha kwikitambula ne poso mwaamba ku Jibwe.

<sup>94</sup> Aye waletele meema-apana bumi, kwakubula mali nangwa kwakubula mutengo ne. Kabiji batomene, ne bang'amela baabo batomene, ne baana babo batomene, kabiji ikijitu nsulo ibena kupita mungyetu.

<sup>95</sup> Kabiji nanchi Aye ye Jibwe leelo, mu iye ntanda ya kukooka, ku bantu babena konaika. "Yense waitabila mwi Aye kechi akonaike ne, poso waikala na Bumi Bwapeenape."

<sup>96</sup> Monai. Kila bufuku, kechi bafwajilwe kuya na kukeba shinkwa ne. Shinkwa wabo waletelwe kwi abo, kila bufuku, wakatatakatu.

<sup>97</sup> Tubena kuya leelo na kutambula shinkwa umo. Inge obewa wi kalomba, kabiji waya kokwa ku shitolo, na kwamba mba, "Amiwa nakeba shinkwa."

<sup>98</sup> Aye wakonsha kwamba mba, "Mweshai, patanshi, kibese kyenu. Amiwa nafwainwa kwikala na mangwe tweti-faivi payuwe shinkwa."

<sup>99</sup> Kabiji kika kyo uji nakyo umvwe wamutambula? Akye ke lunengezho lucheche lubena kukebewa, bino obewa uji na kyokya kicheche kifuma ku wichi. Abo bafumyamo onse aa—aa mavitaminini, yonse kaka, ne kwiipana ku ngulu. Mwamvwangula manyi na bikwata kaaka pamo, ne kwibinyunga, kabiji ne kulengamo shinkwa, walengwa na ndochi, na maboko andochi, bimye byavula. Mwakonsha kumona bitanwa mu shinkwa wenu, kimuye kimo, mushinshi wa nsuki, ne bintu byatama, kabiji ne bipimvwa bya puku, kabiji ne bintu biponena momwa mu mabbekali. Bantu babi bajji na bikola bisambukizhana, ne bintu byonse, bimvwangamo. Inge mwakonsha kumona byo alengwa, kechi mwakonsha ne ku muja ne. Kabiji, nangwa byonkabyo, obewa ulipila ma tweti-faivi maseti nangwa kechi wikitambula ne.

<sup>100</sup> Kabiji Lesa wibajishishenga kila bufuku, na shinkwa walengwa na maboko aba Malaika; kwakubula mali, kwakubula mutengo ne. Kabiji, leelo, awa shinkwa waimenako Kilishitu, Bumi bwa bumupashi, wafumine Mwiulu, mu kupana Bumi Bwanji.

<sup>101</sup> Kabiji Lesa upana ku baana Banji, pajuba pajuba, kyakupitamo kipyा. Vulukai, inge balama yewa shinkwa kukya lukeelo, wabolele.

<sup>102</sup> Mumvwa muntu umo kwambapo pa kintu kimo, "Kyawama, Amiwa njina... Amiwa nemubuula. Amiwa ne mwina Luther. Amiwa ne Presbyterian, Baptist. Amiwa ne Pentekosito," awa ke shinkwa wakala walengwa-namaboko. Abyo byo biji, bijitu byandochi, kabiji byalengwa ku maboko a bantu.

<sup>103</sup> bino umvwe mwaumvwa lushimuno lwa kyakupitamo, kyakatataka, "Lukeelo luno, mu milombelo, Mupashi Wazhila wabatizhe mu mweo wami bukatataka," oo, mulongo, ako ke

Kanjo ka Bamalaika. Aye wibajiisha kakatataka, pajuba pajuba, kufuma Mwiulu.

Mvula wa mapesho ye tukeba;  
 Miso yalusa ibena kunonka po twaikala,  
 Pakuuba mvula ye twasashijila.

<sup>104</sup> Oo, ee, mutuma kufuma Mwiulu, wakatataka, Nkambo, Kilishitu Shinkwa wa Bumi. Mutayai Aye mu muchima wami, kabiji lekai ng'umvwe lusekelo na Kyeenyi Kyanji kikatampe.

<sup>105</sup> Kine, badinga basata bingi. Badinga basata bingi. Kabiji mwanamulume uji yense nangwa mwanamukazhi wasemwa ku Mupashi wakwa Lesa, kabiji watambula ne Mupashi Wazhila, kimye kyonse ukekala wa kusata. Nangwa kikale byepi, ukekala wakusata.

<sup>106</sup> Nobe mucheche, nsongwalume mpofu ku mitumba, Benny mucheche, aye wasemekelwe. Pepi nobe bang'ondo eiti, kabale katatula kukoma pa meso anji. Basemi banji badinga bayaji. Abo baikalanga mu buchimba ku lubaji lwa mutumba. Kabiji abo bayukile mba akwa kumutumbula kwakonsha kupulusha meso akwa Benny wa mucheche, pakuuba mba amone. Aye pano wajinga nsongwalume wa myaka twelufu. Basemi yanji bamonangatu yafikilamo kumona shinkwa wabo ne nyama pa mwaka. Abo kechi bakonsheshe kutumbula ne.

<sup>107</sup> Bonse bena kikala kulo, pamo, bamwenenga Benny wa mucheche byo aesekelelenga kukaya na banyike babacheche, mpofu. Aye kechi wamwnenga byo aubilenga ne. Bamumvwijilenga lusa. Kabiji yense, mu yewa mwaka, wakizhizhemo kujima. Abo baingijile nangovu mu mute. Kabiji kajo byo bekapoteshe mu kimye kyakisalo, basendele mali ne kukajizha Benny wa mucheche pa sitima, ne kumutwala ku badokotala.

<sup>108</sup> Abo bamutumbwiletu bulongo. Kabiji byo abwelele jibiji, bonse bena kikalakulo bapwijile pamo Benny wamucheche byo afumine mu sitima. Anji acheche, meso atoka abembejilenga. Watatwile kubijika ne kujila, byo atajile pa bilungi byabo.

<sup>109</sup> Umo wamakondakita waambile mba, "Mwaan wamulume, patailwe mali anga pakoko kutumbulwa?"

<sup>110</sup> Aye waambile mba, "Anweba, Amiwa kechi nayuka byo kyasendejile baabo bantu ne. Bino Amiwa nasekela bingi amba Nakonsha kumona bilungi byabo, aba balipijile mutengo."

<sup>111</sup> Ao ye musango ye tumvwinamo. Amiwa kechi nayuka mutengo Wasendele Lesa ne. Nayuka mba Aye wampele kyawamisha kyo ajinga Nakyo, Mwaana Wanji. Bino Nasata bingi pa kwikala na meso a bumupashi, kyakuuba mba Nakonsha kutala mu kilungi Kyanji kabiji ne kuyuka mba Aye wamfwijile. Amiwa kechi nayuka ne kana Aye Watayilepo aanga. Atweba kechi tujipo na mo twafwainwa kufwanyikizha

ne. Mutengo wabaya bingi. Amiwa kechi nakonsha kwi mubuula byo kiji ne. Bino Nasata. Amiwa nasata, kuuba mba, kimye kimo Najinga mpofu, pano Nakonsha kumona.

<sup>112</sup> Amiwa nasata kimye ba Moyo Brothers bambujile mba kimye kyami kyapwa, kimye badokotala po baambujile mba Amiwa kechi nakonsha kutwajijila kwikala na bumi myaka yavula ne, myaka tweti-faivi yapitapo, Amiwa njina bumi leelo. Amiwa kechi nayuka ne kana Lesa kya musendejile aanga, bino Nasata Amiwa njina bumi.

<sup>113</sup> Kimye kimo Najinga ndengamambo, wakaswa mu bubi, na muchima ubena kupya, na kuchina lufu. Bino, leelo, lufu ke lushijilo lwami. Aleluya! Kyakonshatu kundeta mu Kyeenyi Kyanji ye Natemwa, kyakuuba mba Nakonsha kutala pa kilungi Kyanji. Aye wapipwile kyokya kintu, kupichila mu kutumbula, Aye wasendele muchima wami ne kumwalula ke upya. Nayuka mba kintu kimo kyamwekele kwi amiwa.

<sup>114</sup> Mu pepala wa byambo mwaka wapwa, ku Minnesota, kwajinga nsongwalume mucheche wasendele kinga yanji ne kuya ku kipwilo lukeelo lumo, ku sukuulu wa Pamulungu. Mwanamulume mukwabo mwanyike mukikalakulo, aye kechi wajingapo na mwingilo wa sukuulu wa Pamulungu ne, wasendele mutemwe wanji nsongwakazhi na kutezhimuka pa mabebe amashika. Kabiji awa mwanamulume wajinga wakoma, wafikijile mu aishi mucheche ne kupona waponene. Aye wasekele nsongwalume wamucheche alwa lukeelo byo ailenga mu mukwakwa, wabuujile nsongwakazhi mulunda nanji, waambile mba, "Aja ke jibumba ja kisangajimbwe jibena kuya ku kyokya kipwilo." Kabiji byo aponene mu aishi, nsongwakazhi mulunda nanji wajinga palepa nanji. Aye wajinga wakasuluka; wafuminepo. Bino byo aishile wabika maboko anji pa aishi, waikele na kalepu, kabiji waikele ponkapa pa aishi.

<sup>115</sup> Nsongwakazhi wanji waesekele ku mukwasha, bino wajinga wanema bingi, wakonsha kutwela-mu aishi. Aye wabijikile kwi aye mba, "Bwela lunyuma! Bwela lunyuma! Usakutwela mukachi, kabiji ne atweba bonse babiji tusakukulukilamo." Aye wabijikile, wajijile, kabiji kechi kwajinga kyakumukwashako ne.

<sup>116</sup> pakupitapo kimye kicheche, peulu ya katumba, kwaishile kinga icheche, na kukyofwa, nsongwalume mucheche na Baibolo mu kuboko kwanji. Aye waumvwine kubijika, kabiji waendeshe lubilo kinga yanji icheche. Wabikile Baibolo wanji panshi, ne kunyemena mu aishi. Wakalabijile munda mwanji, na byakumvwala byanji byawama, poso byo akwachile maboko a mwanamulume, kabiji watwajijiletu na kumukookela panyuma, poso wamufumya mu aishi. Wanyemene na kwimika motoka. Baichile ambulasi kabiji bamutwajile ku kipatela.

<sup>117</sup> Panyuma byo ayile walipijile ne ambulasi, walipijile madokotala pa kwaswa manguya akubula mashi mu mubiji ne bintu byo asendele, aye waishile ku nsongwalume mucheche. Aye waambile mba, “Mwaana, Njina nakongole yobe inga?”

Aye waambile mba, “Kafwako.”

<sup>118</sup> Aye waambile mba, “Amiwa njina kongole ya bumi bwami.” Kilangulukai kye. Mali kechi akonsheshe kwi bulipila ne. Kyajingatu bumi bwanji.

<sup>119</sup> Abyo byo twafwainwa kumvwa na mambo akwa Lesa. Kechi kupota jishinda jetu na kintu kimo ne; pakuuba atweba tuji nakongole ya bumi bwetu kwi Lesa, mambo atweba tubena kufwa ne kutwela mu kimbo kya bubi. Lesa wakumbachile maboko ne mukukumba Wanji.

Natwelelenga mukuzhika kwa bubi,  
 Kufumatu ku kitulu kya mutende,  
 Musombelo wazhika bingi,  
 Kwibila kya kukakalwa kubukapo ne;  
 Pakuuba Nkambo ya kalunga  
 Waumvwine kujila kwami,  
 Kufumya mu meema wasutwile,  
 Pano Amiwa njina mutende.

<sup>120</sup> Amiwa njina kongole Yanji ya bumi bwami. Anweba muji na kongole Yanji ya bumi bwenu. Anweba muji na kongole Yanji ya bumi bwenu, bwa kumwingijila Aye; kechi kwibupana ne, kwendauka ne kwambaamba pa kipwilo kya dinominesheni wenu; kechi kuya na kujimbulula bakwenu ne. kana kweseka na kwingijila ne kupulusha bakwenu, kabiji ne kwibaleta ku maana a Nkambo Yesu Kilishitu.

<sup>121</sup> Awa mwaana walubile. Mukupezhako, Nakonsha kwamba kikye. Byo aonawine bwikalao bwanji bonse, bwikalao bwa bashanji, na bwikalao bwa boono, kabiji kimye kyo abwelelenga ku nzubo... Aye walajile mu kipaka kya bangulu, kabiji wabwelele mu bumuntu bwanji. Kabiji aye waambile mba, “Baanga bamingilo bataata, baji ne bataata, baji na byavula bishalapo, kabiji Amiwa njikuno na kufwa, mambo ka.” Pano inge waeseka kwamba mba, “Nakumya kana Njina na mali o Nakonsha kubwezha (o Nataile na kukaya) kulipila ku bataata?” Bino aye wayukile musango wa bashanji, kabiji waambile mba, “Amiwa nsakubwela ku bataata.”

<sup>122</sup> Bashanji kechi baambilepo mba, “Pembelaikotu mineti umo, mwaana! Bushe ubena kubwezha mali ami nyi?” Ine. Aye kechi wa mulipilishe pa bubi bwanji ne. Aye wajinga na lusekelo pa kubwela jibiji. Aye wajinga na lusekelo mambo wabwelele mu bumuntu bwanji, mambo wajinga mwaana wanji. Aye wajinga mwaana wanji mwine. Aye wajinga na lusekelo pakubwela ku nzubo. Bino, aye kechi waitabizhe bubi bwanji ne, bino wajinga bingi na lusekelo byo abwelele mu bumuntu bwanji ne kwamba

mba, "Amiwa nalenga mambo ku meso akwa Lesa wami, kabiji ne ku meso a bataata. Amiwa nsakubwela kwi abo."

<sup>123</sup> Kabiji byon amumwene, palepa, wamunyememejile ne kumufyopa. Kabiji aye waambile mba, "Ipayai mwaana ng'ombe wanuna," kwakubula mali ne. "Muletelai mukukumba wawamisha," kwakubula mali. "Letai kambalaminwe," kwakubula mali, "kabikai ku munwe wanji. Twayai tuje, kutoma, ne kusangalala, mambo awe mwaana wami walubile kabiji pano walubuka. Aye wafwile, kabiji uji na bumi jibiji. Twayai twikale nalusekelo pakikye."

<sup>124</sup> Lekai Ng'ambe kikye, balunda, pa kupwisha. Kintu kileta kutondwa, kintutu kijiko ke, kintutu kimo kyawama kijiko ke, kechi kyakonsha kupotwa na mali ne. Ke bya bupe bya kwa Lesa, mwi Yesu Kilishitu: kulupulukilo lwa mweo; lusekelo. Iyai muje, mutondwe.

*Mambo ka o mutayila mali enu pa bantu byo mubula  
kuja? ne mfweto yenu pa bantu byo mubula kutondwa  
ne? telekai bulongo kwi amiwa, ne kuja...byawama,  
kabiji lekai mweo wenu asangalale pa kuja byanuna.*

*Kunyikai matwi enu, mwiye ko nji: mumvwe,  
kabiji muchima wenu ekale na bumi; kabiji Amiwa  
kalayang'ana nenu lulayang'ano lwa myaka,  
lwakwimubila bya lusa lwa kine kine lwa kwa Davida.*

<sup>125</sup> Bantu byonse byakikupu, bantu byonse byawama, bantu byonse byawaina, bantu byonse bya Peenape, byatutu, kabiji kechi pajipo malipilo ne. Kupelo ya kunembwa kwa uno Buuku, waamba mba, "Yense wakonsha, mulekai eye na kutoma kufuma ku Meema a nsulo ya Bumi, kyatutu," kwakubula mali, kwakubula mutengo ne. Kika kyo mutaila mali enu na bantu bibula kutondwa ne, ne kuleka bantu byakine biletakutondwa, byatutu, byaikala bibulwa kusungwa ne anweba?

Twayai tulombe.

<sup>126</sup> Kimye kyo mwazhindama na kulomba, mujipo, mu kino kishimikwa, lukeelo luno, abo babula kutoma kufuma ku Nsulo, amba byakukabila bya muntanda bikiji mu bumi bobo, kabiji wakonsha kukeba kupipula kifulo kyobe kya kutomenapo, lukeelo luno, nangwa kwingijisha kwa mali obe? Obewa wakeba kwiya na kupota kufuma kwi Lesa, (kwakubula mali, kwakubula mutengo ne), buki ne mukaka, lusekelo lwa binyu? Mwakonsha kusutulako kuboko kobe, ne kwamba mba, "Mvulukaipo, Mulongo Branham, byo ubena kulomba"? Lesa emupeshe, mwane. Lesa emupeshe, mwane. Lesa akupeshe, nyenga. Bushe kujipo bakwabo bakonsha kwamba mba, "Mvulukaipo, Mulongo Branham, byo ubena kulomba"?

<sup>127</sup> Anweba bambo banyike, ee, abo baonauna bwikalobwabo. Aa—aa—ma awala bamaama obataile na kwimulombelela,

ne bataata, lufunjisho lonse lwapewa kwi obewa, nangwa byonkabyo kechi mwiluswa ne, na kuteleka ku kutepeta kwakwa diabola. Pano anweba mubena kukeba kwimba nyimbo ya muntanda, bintu bya muntanda. Kabiji ubena kubwela mu bumuntu bobe, nobe byajinga mwaana walubile mu kipaka kya bangulu. Mwakonsha kusutulako kuboko kobe, nyenga, mulongo, ne kwamba mba, “Lesa, mvulukaipo. Mbwezhai mu bumuntu bwami, lukeelo luno, lekai ngiye ku nzubo ya Bataata”? Kechi kimutailapo nangwa kintu kimo ne. Aye ubena kukuketekela. Nangwa wauba kyamusango ka, “Nangwa mambo enu achilatu ngee, akekala ke atokatu too nobe sino; achila nobe mashi, akekala atoka pamo nobe booya bwa mukooko.” Abo baji mu Kyeenyi kya Bulesa, abo bakonsha kusutula kuboko kwabo?

<sup>128</sup> Aba bakolwa kabiji baji na byakukabila, ne kwamba mba, “Na—Naponene mukimbo. Satana wa—wauba kyatama kwi amiwa. Aye wandemeka kabiji wandengela kukolwa, nangwa kintu kimo. Nakabila lukeelo luno, cheni wa lwitabilo lwa kwa Lesa lwiye mu muchima wami, alo lwakonsha kundosa kufuma mu kimbo, nobe yewa mwanamulume pa kibelo kyatelwa mba Kyabuya.” Sutulaiko maboko enu. Lesa emupeshe, umo umo.

<sup>129</sup> Nkambo, Amiwa naleta kwi Anweba, kino kimye, aba basutula maboko abo, na mambo alulekelo lwa mambo abo. Anweba mwi Lesa, kabiji Lesa yekatu bunke. Ponka pano po baikala, apo ipo Anweba po mwajikwamba kwi abo. Apo ipo Anweba po mwajikwibashinina amba baji mukilubo, inge Kyambo kyatana mpuzha Yakyo, kabiji ne Mupashi Wazhila watatula kwamba, mba, “Obewa waya mungi. Alulukai, ne kubwela jibiji kwi Lesa Taata.” Kabiji bakusutula maboko abo, mu kumwesha mba babena kukeba kufuma mu kipaka kya bangulu kya panopantanda, kwiya ku nzubo ya Bataata, kuji byavula, ako kobakabula kuletapo nangwa kimo ne. Nobe byonka byaamba wasapawilo, “Kafwako nangwa kimo kiji mu maboko ami kyo Naleta ne, Naimenatu konka ku musalabu Wenu.” Lekai beye, na buwame, na kwikepesha, ne kushininwa, kabiji ne kupana bumi bwabo. Kabijki Anweba mukaleta mukukumba wawama; ne kambalamunwe, kabiji ne kubika ku minwe yabo; kabiji ne kwibajisha na Manna a kwa Mwanamukoko waipaiwa. Kiswishai kye, Nkambo.

<sup>130</sup> Kuji boba bakolwa ne bamanyikwa. Baji na byakukabila. Satana wibataya mu kimbo, kafwako luzhinauko ne, kwabula mali akutumbwilwa. Kechi kyakuzhinauka ne, kape, bavula ba mwiabo kechi bakonsheka kutumbulwa ne. Kapepo dokotala kechi wakonsha kufumya kyaleta lukatazho ne, nangwatu inge aye wajinga na mali avula bingi. Bino Anweba mwi Lesa. Kabiji Nalomba mba yenka uno awala, na kushingwa kwa manyi kwa Mupashi Wazhila waikala pakino kimye, amba Anweba musakwibabuka bonse. Lekai babukwe, kufuma ku mutwe

kufika ne ku maulu, paji ponse ponse.

<sup>131</sup> Inge baikala kwakubula lusekelo; lupulukilo lwabo, kechi bakonsha kumwenamo lusekelo ne. Nobe byonka byaambile Davida, wakala, "Bwezhai lusekelo lwa lupulukilo lwami." Lekai batambule lusekelo ne buwame, mambo abulanda ne kunemenwa, mambo Anwba mwi Jibwe mu ntanda ya kukooka. Anweba yenu kifutele mukimye kya kikukwila. Umvwe diabola ubena kutaya misongo yonse ne mamizaile pe abo, Anweba yenu kifutele mu kimye kya kikukwila. Lekai kikale byonkabyo, leelo, Lesa, mambo twikipuzha mu Jizhina ja Yesu. Amen.

Bitende bitende na jiwi jawama Yesu ubena kwita,

Ubena kwita obewa, ne amiwa,

Nangwa twalenga mambo, Aye uji na lusa ne kulekela mambo,

Kulekela mambo obe ne ami.

Iya ku nzubo . . .

<sup>132</sup> Pano, inge ubena kukeba, iyai kuno ku kitapisho ne kufukama, twakonsha kulomba ne anweba, kukushinga manyi, kintu kyonse kyo twakonsha kuuba. Anweba mwatambulwilwa.

. . . kukooka, iyai ku nzubo;

Nalupata, na muchima wanekena, Yesu ubena kwita,

Ubena kukwita, Obewa ndengamambo, iyai ku nzubo!

<sup>133</sup> Bushe mwamutemwa Aye nyi? Teddy, wakonsha kwitupa pa kusawila, "Namatemwa Aye, Namutema Aye mambo Ye wajinga mutanshi kutemwa." Bushe wakonsha kuuba kyokyo nyi?

<sup>134</sup> Twayai tumwimbile konka ku lukumo Lwanji, kasa tukyangye kupipula ndonda ya mpwjilo, pa kakimye kachechetu. Abwe ke bupopweshi. Aye Mbila yaletwa. Amiwa nasekela bingi mambo anweba Mwiitambwila. Lombai mba Isakwimubila kyawama, mambo yangubijile kyawama pa Kwiyamba. Nalomba mba lutundaiko lomo lwa painwe kwi amiwa, pa Kwiyamba kwi anweba, anweba mwaji Kwiyyitambula na lutundaiko lomo mo Yatumijilwe. Lekai Nkambo Eipeshe ku muchima wenu. Kijitu bulongo.

Namatemwa Aye,

Pano zhizhibalai meso enu, byo tubena kwimba. Sutulaiko maboko etu.

. . . Namutemwa Aye

Mambo Ye mutanshi watemenwe

Kabiji wapotele lupulukilo lwami

Pa kichi kya ku Kalvali.

<sup>135</sup> Pano twayai tukunyike mitwe yetu, munyinyitai. Anweba mwamutemwa Aye nyi? Bushe Aye kechi wakine ku muchima

wenu ne? Bushe kechi kujipo kintu kimo pe Aye ne, akyo kiji kyakine? Namutemwa Aye mambo Ye mutanshi kutemwa, ye watajile Bumi kufuma ku Kalvali, wakobelwe Aye ku muchima wami.

<sup>136</sup> Kechi mulubeko ne, Mulongo Drummond usa kusapwila bufuku buno, bufuku bwakijilo. Inge anweba mwamutemwa Nkambo, iyai kuno mwikale na kijilo ne atweba. Inge Nkambo waswa, Amiwa nsakwikala muno ne anweba. Awa ye muko-wamulume wakwa Mulongo Tonny Zabel; Mulongo Thom kufuma ku Africa; mwaana wanji, nsongwalume wawama; wawama bingi, Mwinakilishitu waimana bulongo, wawama musapwishi mucheche.

Mambo Ye mutanshi watemenwe  
Kabiji wapotele lupulukilo lwami  
Pa kichi kya ku Kalvali.

<sup>137</sup> Mu kimyen kyo twakunyika mitwe yetu pano, piyano kimye kyo abena kutwajijila.

<sup>138</sup> Nkambo Yesu, tubena kutwela mu kupwila kukwabo, Nkambo. Twimusachila Anweba pa Mupashi Wazhila wajikwamba ku michima yetu. Kabiji tuji bingi na lusekelo, Nkambo, amba Anweba mwajikwitubila kikye. Kabiji lekai Kyambo Kyenu kechi kibwele kwi Anweba kyatutu ne, bino lekai Kififikizhe byo Kyafwainwa kuuba. Lekai Kikale mu michima yetu yonse, na kuyuka mba bintu byonse byakine kabiji bintu byonse byakikupu bifuma kwi Lesa, kwakubula mali, kwakubula mutengo ne. Kika kyo twafwainwa kulwishisha bintu, kabiji ne kwikipa musango-wa bumi-ne lulu, pa bintu bikonaika? Twayai tutwajijile kuya kulutwe, Nkambo, pa bintu bibula konaika, abyo byabula mutengo ne. Mutengo wapanwa kala kyatutu, kabiji ne kutambulwilwa bulongo, "Yense wakonsha, mulekai eye."

<sup>139</sup> Peshai kuya lutwe lwa lubaji lwa kukwe kupwila. Kiswishai kye, Nkambo. Kabiji ne kusambakana netu bufuku buno. Peshai pwijilo ya lubatizhilo. Lekai kwikale kwitulwilwa kukatampe. Lekai babo bantu, basa kubatizhiwa mu Jizhina ja Mwaana Wenu ye natemwa, aye Nkambo Yesu, lekai bayuzhiwe na Mupashi Wazhila. Lekai babo bantu, basutula maboko abo, balapile, lukeelo luno, ku bubi bwabo, lekai beye, twelai mu byakumvwala bya lubatizhilo, ne kutwela mu kizhiba, kabiji bashinikishe ku ntanda amba balekelwa bubi bwabo. Kabiji babena kubatizhiwa, na mambo akulekelwa mu buuku. Kiswishai kye, Nkambo.

<sup>140</sup> Mwikale na Mulongo Drummond bufuku buno byo asakwituletelako mbila, ipya kufuma ku Jitanda. Mushingai manyi na Mupashi Wazhila. Kabiji mwikale ne atweba byo tusakujanga kijilo. Lekai michima yetu ekale yatoka ne kuwamishiwa, kechi mwikalepo mizhilulwila mwi atweba ne.

Lekai Mashi akwa Yesu etomvwe atweba kufuma ku bubi bonse. Kiswishai kye, Nkambo. Mfumya misongo pakachi ketu, kabiji mwitupe lusekelo ne mutende. Kupichila mwi Yesu Kilishitu twikipuzha. Amena.

Namutemwa . . .

<sup>141</sup> Bushe mwamutemwa Aye nyi? Pano sutulaiko maboko enu kwi Aye.

Namutemwa Aye  
Mambo . . .

Pano tanyikai maboko ne kwi imuna na muntu umo uji ku lubaji lwenu.

. . . patanshi . . . (Russell, Namutemwa Aye.  
Inge Nafwa leelo, Amiwa namutemwa Aye.)

Kabiji wapotele . . .

Abyo ibyo, tanyikai kuboko kwenu ne kwiimuna maboko.

. . . lupulukilo  
Pa Kalvali pa . . .

Kijitu bulongo, Mulongo Neville, na kyambo kyanji. Kijitu bulongo. 

59-0802 Kwakubula Mali Nangwa Kwakubula Mutengo  
Branham Tabernacle  
Jeffersonville, Indiana U.S.A.

KAONDE

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)